



Hasanu Hodžiću sedam godina zatvora

Sudsko vijeće Kantonalnog suda u Tuzli jučer je nepravosnažno na sedam godina zatvora osudilo Hasana Hodžića, bivšeg direktora Kazneno-popravnog zavoda u Tuzli, zbog zloupotrebe položaja i ovlasti. Istovremeno, kako smo saznali u Kantonalnom sudu, naloženo mu je i da vrati blizu 200 hiljada KM, koje je zloupotrebom položaja, odnosno nelegalnim zapošljavanjem u KPZ-u Tuzla, stekao od 2006. do 2010. godine. Kako nam je rečeno u Sudu, Hodžić će pravosnažnost presude dočekati na slobodi, jer mu je jučer prilikom izricanja presude ukinut pritvor.



- Sudsko vijeće je donijelo rješenje o ukidanju mjere pritvora za osuđenog Hodžića, s obzirom na to da je riječ o još nepravosnažnoj presudi. Služenje zatvora će uslijediti ukoliko presuda bude pravosnažna, a u kaznu će biti uračunato i vrijeme koje je Hodžić proveo u zatvoru od 16. aprila prošle godine, saopšteno nam je iz Suda.

Podsjećamo, Hodžić je uhapšen 16. aprila prošle godine u akciji kodnog naziva Brava II, koju je provela SIPA po naredbama Kantonalnog suda u Tuzli i Tužilaštva TK-a. Hodžić je sa još četiri osobe tada uhapšen pod sumnjom da je, dok je bio direktor KPZ-a Tuzla, uz pomoć ostalih uhapšenih, nalazio osobe koje su bile voljne zaposliti se u zatvoru, te od njih uzimao novac za tu uslugu. Odbrana Hodžića najavila je žalbu na presudu.

M. A.